



Reglur um stuðningsfjölskyldur í Sveitarfélaginu Hornafirði

I. kafli

Almenn atriði

1. gr.

Lagagrundvöllur og markmið

Velferðarsvið Sveitarfélagsins Hornafjarðar skal hafa tiltækar stuðningsfjölskyldur. Reglur þessar eru settar með vísan til 15. gr. laga nr. 38/2018 um þjónustu við fatlað fólk með langvarandi stuðningsþarfir, 85. gr. barnaverndarlaga nr. 80/2022 auk laga nr. 40/1991 um félagsþjónustu sveitarfélaga.

Um málsmeðferð skv. IV. kafla reglna þessara gilda ákvæði stjórnisýslulaga, nr. 37/1993 og ákvæði XVI. og XVII. kafla laga um félagsþjónustu sveitarfélaga nr. 40/1991.

Markmið þjónustunnar er að létta álagi á fjölskyldur barna og gefa börnum möguleika á aukinni félagslegri þátttöku. Markmiðið er jafnframt að veita barnafjölskyldum stuðning og skal hann vera í samræmi við það sem barni er fyrir bestu. Úrræðið getur bæði talist til þjónustu innan barnaverndarþjónustu og félagsþjónustu.

2. gr.

Hverjir eiga kost á þjónustu

Þjónustan stendur til boða fyrir fjölskyldur fatlaðra barna sem eiga lögheimili í sveitarfélaginu, sbr. 1. og 2. mgr. 2. gr. laga um lögheimili og aðsetur nr. 80/2018. Þá stendur þjónustan einnig til boða fyrir ófötluð börn sem úrræði á vegum barnaverndarþjónustu. Jafnframt getur félagsþjónusta boðið þjónustuna fyrir fjölskyldur sem eiga í félagslegum erfiðleikum og eru metnar í þörf fyrir aukinn stuðning, svo sem vegna félagslegra erfiðleika eða fjölskylduaðstæðna.

Heimilt er að framlengja samninga 18 ára og eldri um stuðningsfjölskyldu á grundvelli mats á þörf á meðan leitað er að annarri viðeigandi þjónustu.

3. gr.

Inntak þjónustunnar

Stuðningsfjölskylda er aðili sem fenginn er á vegum velferðarsviðs Sveitarfélagsins Hornafjarðar. Stuðningsfjölskyldum er fyrst og fremst ætlað að taka á móti barni, eða í sumum tilvikum barni og foreldrum, í því skyni að m.a. tryggja öryggi barnsins, létta álagi af barni og fjölskyldu þess og eftir atvikum leiðbeina foreldrum og styðja þá í uppeldishlutverkinu.

Þörf barns fyrir stuðningsfjölskyldu er alltaf metin í samráði við foreldra þess. Leitast skal við að veita barninu þjónustu inni á heimili þess eftir því sem kostur er. Við matið er horft til aldurs barns, eðlis og umfangs fötlunar, félagslegra aðstæðna, mats á stuðningsþörf sem og annarrar þjónustu sem veitt er. Taka ber tillit til óska foreldra við val á stuðningsfjölskyldu eins og unnt er.

Þjónusta stuðningsfjölskyldu miðast við sólarhringsþjónustu og getur þjónustan mest verið 6 sólarhringar í mánuði. Einnig getur hún verið hluta úr degi, en að hámarki 20 klst. í mánuði eða helgadvöl eina helgi í mánuði.

Ekki er heimilt að fela stuðningsfjölskyldu umsjón fleiri en tveggja barna í senn nema um systkini sé að ræða.

4. gr.

Skipulag þjónustunnar



Velferðarsvið Sveitarfélagsins Hornafjarðar sér um framkvæmd þjónustunnar. Þegar um barnaverndarmál er að ræða nær þjónustuvæðið til Sveitarfélagsins Hornafjarðar en meðferðarfundur barnaverndarþjónustu Fjarðabyggðar og Sveitarfélagsins Hornafjarðar, undir stjórn stjórnanda barnaverndarþjónustunnar, tekur ákvarðanir um framkvæmd þjónustunnar.

Allir íbúar Sveitarfélagsins Hornafjarðar eiga jafnan rétt til þjónustunnar að uppfylltum öðrum viðmiðum skv. reglum þessum.

II. kafli

Stuðningsfjölskyldur

5. gr.

Val á stuðningsfjölskyldu

Velferðarsvið Sveitarfélagsins Hornafjarðar ber ábyrgð á skipulagi og framkvæmd þjónustunnar á grundvelli 1. mgr. 5. gr. laga nr. 38/2018. Í því felst meðal annars að val á stuðningsfjölskyldu sé í samræmi við skýrar faglegar kröfur og að stuðningsfjölskylda uppfylli þau skilyrði sem ákvörðun byggist á hverju sinni. Sé þjónusta stuðningsfjölskyldu sótt milli sveitarfélaga skal samstarf vera milli þeirra um athugun. Félagsþjónusta lögheimilisveitarfélags barnsins er eftir sem áður ábyrgðaraðili við framkvæmd þjónustunnar.

Stuðningsfjölskyldur þurfa að hafa tilskilið leyfi frá Gæða- og eftirlitsstofnun velferðarmála, sbr. 7. gr. reglna þessara.

Val á stuðningsfjölskyldu getur verið með tvennum hætti:

- a) að leyfi sé veitt stuðningsfjölskyldu á grundvelli umsóknar þar að lútandi
- b) að tekin sé ákvörðun hverju sinni um að ganga til samninga við tiltekna fjölskyldu um að veita þessa þjónustu.

6. gr.

Hlutverk og ábyrgð stuðningsfjölskyldu

Hlutverk stuðningsfjölskyldu er að taka barn í umsjá sína í skamman tíma, í þeim tilgangi að létta álagi af fjölskyldu þess og auka möguleika barnsins á félagslegri þátttöku. Slíkri umsjá fylgir ekki krafa um sérstaka þjálfun eða hæfingu umfram þá daglegu þjálfun sem felst í almennum kröfum sem lúta að uppeldi barna. Stuðningsfjölskylda er ekki til þess fallin að leysa margþættan eða umfangsmikinn vanda ein og sér en er mikilvægur þáttur í því að styrka foreldra og barn.

Stuðningsfjölskylda ber ábyrgð á velferð barns meðan á dvöl hjá henni stendur og skal hlúa að því í hvívetna. Það á jafnt við í tilfinningalegu, heilsufarslegu og félagslegu tilliti.

Stuðningsfjölskylda skrifar undir þagnarheit varðandi þær upplýsingar sem hún fær um einkahagi viðkomandi fjölskyldu. Einnig skulu forráðamenn barns undirgangast þagnareid varðandi hagi stuðningsfjölskyldu. Þagnarskyldan helst eftir að dvöl lýkur og þó samningur renni út.

7. gr.

Leyfi til að gerast stuðningsforeldri

Gæða- og eftirlitsstofnun velferðarmála veitir leyfi til stuðningsfjölskyldna að fenginni umsögn starfsmanna velferðarsviðs. Sótt er um leyfi til að gerast stuðningsforeldri beint til stofnunarinnar í gegnum innri vef hennar.

Alla jafna skulu amma og afi barns ekki gerast formlegir stuðningsforeldrar fyrir barnabarn sitt, nema í sérstökum undantekningartilvikum þegar það þjónar hagsmunum barnsins best að mati fagteymis fjölskyldu- og félagsþjónustu eða skv. niðurstöðu meðferðarfundar barnaverndarþjónustu.



8. gr.

Greiðslur til stuðningsfjölskyldna

Stuðningsfjölskyldur gera verksamning við Sveitarfélagið Hornafjörð. Samningsfjárhæð tekur almennt til þeirrar þjónustu sem stuðningsfjölskylda veitir hverju sinni. Samningsfjárhæðin skal taka mið af því hversu mikil þjónusta er veitt (í sólarhringum eða klukkustundum), umönnunarþörf, félagslegri stöðu barnsins og fjölskyldu, sem og stigskiptingu eftir umfangi fötlunar, eftir atvikum.

Greiðslur til stuðningsforeldra fatlaðra barna taka mið af umönnunarflokki barnsins samkvæmt Tryggingastofnun og niðurstöðum SIS-C mats frá Ráðgjafar- og greiningarstöð. Greiðslur til stuðningsforeldra fyrir dvöl hluta úr sólarhring miðast við hálf og heilt sólarhringsgjald. Fyrir dvöl sem varir í 7 til 10 klst., einn dag í mánuði, greiðist hálfur sólarhringur. Ef dvölin er tvisvar í mánuði er greitt fyrir einn sólarhring og þannig koll af kalli.

Sé þjónusta stuðningsfjölskyldna veitt fyrir tilstilli barnaverndarþjónustu, fá stuðningsfjölskyldur alla jafna greitt skv. umönnunarflokki nr. 2 hjá Tryggingastofnun og þegar þjónusta er veitt fyrir tilstilli félagsþjónustu, fá stuðningsfjölskyldur alla jafna greitt samkvæmt umönnunarflokki nr. 3.

Upphæð hvers umönnunarflokks hækkar skv. launavísitölu í janúar ár hvert. Miðað er við launavísitölu í lok október árið á undan við uppreikning upphæða. Bæjarráði er þó heimilt að taka ákvörðun um aðra breytingu en vísitöluhækkun á greiðsluupphæðum umönnunarflokka ef ástæða þykir til.

9. gr.

Gagnkvæm upplýsingamiðlun

Velferðarsvið Sveitarfélagsins Hornafjarðar skal, í samvinnu við foreldra barns, veita stuðningsfjölskyldu viðeigandi upplýsingar um allt það sem er mikilvægt fyrir velferð barnsins, þar á meðal heilsufar þess, ofnæmi/óþol, lyfjainntöku og aðrar sérþarfir.

Stuðningsfjölskylda ber ábyrgð á að upplýsa velferðarsvið Sveitarfélagsins Hornafjarðar og forráðamenn barnsins um allt það sem upp kemur meðan á dvöl stendur og gæti haft áhrif á líðan barnsins. Stuðningsfjölskylda skal veita munnlegar eða skriflegar upplýsingar um dvöl barns óski starfsmenn velferðarsviðs eða foreldrar barns eftir því.

Gagnkvæmri upplýsingamiðlun er ætlað að tryggja að framkvæmd sé skilvirk og í þágu þeirra markmiða sem úrræðinu er ætlað að þjóna.

III. kafli

Umsóknir

10. gr.

Ferli umsókna um stuðningsfjölskyldu

Þeir sem óska eftir stuðningsfjölskyldu skulu sækja um í gegnum íbúagátt á heimasíðu Sveitarfélagsins Hornafjarðar.

Þegar umsókn hefur verið móttækin og viðeigandi gögnum skilað, er umsækjandi boðaður í ráðgjafaviðtal. Sé mál þegar til vinnslu hjá velferðarsviði Sveitarfélagsins Hornafjarðar geta starfsmenn þess haft milligöngu varðandi stuðning.

Eftir ráðgjafaviðtal leggur ráðgjafi málið fyrir fagfund fjölskyldu- og félagsþjónustu til afgreiðslu. Niðurstaða fagfundar fjölskyldu- og félagsþjónustu skal kynnt umsækjanda með sannarlegum hætti t.d. rafrænt í gegnum íbúagátt eða með tölvupósti

Telji fagteymi fjölskyldu- og félagsþjónustu ekki þörf á stuðningi í formi stuðningsfjölskyldu ber ráðgjafa að upplýsa umsækjanda um viðeigandi kæruleiðir samkvæmt 15. gr. reglna þessara.



11. gr.

Afgreiðsla umsókna

Allar umsóknir um stuðningsfjölskyldur vegna fatlaðra barna og fjölskyldna sem eiga í félagslegum erfiðleikum eru afgreiddar á fagfundum fjölskyldu- og félagsþjónustu velferðarsviðs Sveitarfélagsins Hornafjarðar. Lagt er mat á umsóknir, magn þjónustunnar ákveðið, ásamt tímalengd samnings og greiðslum til stuðningsfjölskyldna. Við endurnýjun samnings skal fara fram endurmat um áframhaldandi þörf.

Allar umsóknir um stuðningsfjölskyldur þar sem mál er til vinnslu hjá Barnaverndarþjónustu Fjarðabyggðar og Sveitarfélagsins Hornafjarðar eru afgreiddar á meðferðarfundum barnaverndarþjónustu.

12. gr.

Kynning á ákvörðun

Umsækjendum er birt svar um afgreiðslu umsóknar innan fjögurra vikna frá því að umsókn um stuðningsfjölskyldu berst með sannarlegum hætti, t.d. á íbúagátt.

Ef umsókn er sett á biðlista er umsækjendum tilkynnt það. Í synjunarbréfi skal bent á rétt til þess að óska eftir rökstuðningi fyrir synjun og upplýsingar um málskotsrétt.

Ef fyrirséð er að þjónusta sem sótt var um geti ekki hafist innan þriggja mánaða frá samþykkt umsóknar skal leiðbeina umsækjanda um þau úrræði sem hann hefur á biðtíma og aðra þjónustu sem er í boði. Þá skal veita honum aðra viðeigandi þjónustu á meðan beðið er eftir að þjónustan sem samþykkt hefur verið hefjist.

13. gr.

Samningur við stuðningsfjölskyldu

Um dvöl barns hjá stuðningsfjölskyldu skal alltaf gerður sérstakur samningur óháð því hvort val fjölskyldu fer fram á grundvelli umsóknar eða ákvörðunar hverju sinni. Samningur er einnig gerður ef stuðningsfjölskylda er fengin fyrir einstakling 18 ára og eldri eða ef úrræðið er notað sem stuðningur við fatlaða foreldra.

Miðað er við að þjónusta hefjist þegar barn er komið á heimili stuðningsfjölskyldu eða stuðningsfjölskyldan á heimili barnsins ef því er að skipta. Ferðir barns við upphaf og lok dvalar teljast ekki til þjónustu stuðningsfjölskyldu nema sérstaklega sé um það samið.

Forráðamenn barnsins bera ábyrgð á ferðum þess til og frá stuðningsfjölskyldu nema um annað sé samið sérstaklega.

Samningstímabil tengist úttekt á framkvæmd þjónustunnar sem skal eiga sér stað eigi sjaldnar en á tólf mánaða fresti. Í samningi skulu vera gagnkvæm uppsagnarákvæði með þriggja mánaða fyrirvara. Þjónustan er veitt á grundvelli leyfis frá Gæða- og eftirlitsstofnun velferðarmála og tiltaka skal í samningi að hann falli úr gildi um leið og leyfið. Með sama hætti skal tekið fram að samningi megi rifta ef forsendur ákvörðunar eða leyfis breyta.

Í samningnum kemur fram fjöldi sólarhringa í mánuði, almennar upplýsingar um samningsaðila, verkefni stuðningsfjölskyldunnar og greiðslufyrirkomulag.

14. gr.

Framkvæmd þjónustunnar

Við upphaf þjónustu er haldinn fundur með öllum aðilum og gerð grein fyrir hlutverki hvers og eins. Gerður er þríhliða tímabundinn samningur milli stuðningsfjölskyldu, foreldra/forsjáraðila og velferðarsviðs Sveitarfélagsins Hornafjarðar.

Fari foreldrar barns með sameiginlega forsjá þess skulu báðir foreldrar vera upplýstir um hvernig þjónustunni skuli háttað og þess skal freistað að ná sátt um fyrirkomulagið.



IV. kafli

Málsmeðferð

15. gr.

Málsmeðferðarreglur

Málsmeðferðarreglur velferðarsviðs Sveitarfélagsins Hornafjarðar er að finna í V. kafla reglna Sveitarfélagsins Hornafjarðar um þjónustu við börn og fjölskyldur þeirra. En þar koma m.a. fram kæruleiðir vilji umsækjandi ekki una ákvörðun fagfundar fjölskyldu- og félagsþjónustu velferðarsviðs Sveitarfélagsins Hornafjarðar samkvæmt reglum þessum.

16. gr.

Gildistaka

Reglur þessar taka þegar gildi.

Reglur þessar voru kynntar á fundi velferðarnefndar Sveitarfélagsins Hornafjarðar þann 13. janúar 2025, samþykktar á fundi bæjarráðs Sveitarfélagsins Hornafjarðar 21. janúar 2025 og staðfestar á fundi bærstjórnar Sveitarfélagsins Hornafjarðar þann 13. febrúar 2025.